

ՔԱՂՈՒԱԾՆԵՐ ՍԻՆՕԴԻ ՕՐԱԳԻՐՆԵՐԻՑ

Նոյեմբերի 4-ին, թ. 663. Սինոդը լսելով Անիի վանահայր Մկրտչէլ վարդապետի անցեալ սեպտեմբերի 16-ի խնդիրը նրա նիւթական կացութեան մասին, որոշեց. աչքի առաջ ունենալով յիշեալ վարդապետի անհրաժեշտ ծախքերը բազմաթիւ այցելուների ընդունելութեան համար՝ բացի նրա ամսական 26 ռուբ. ռոճկից և «Տայլարի» 15 դես. հողի արդիւնքից, տալ նրան ըստ առաջնոյն ցութեն, գարի, իւղ և պանիր կարսի վիճակից ժողոված պտղի արդիւնքից:

Նոյեմբ. 4-ին, թ. 670. Սինոդը որոշեց. համաձայն Երևանի փոխ-թեմակալ Տ. Խորէն եպիսկոպոսի անցեալ հոկտեմբերի 25 ի, թ. 1497 յայտարարութեան, թոյլ տալ Երևանի «Զրանցք» ընկերութեանը աթոռապատկան «Գետարգելի» հողերովն անցկացնել ջրանցքի առուն այն պամանով, որ ընկերութիւնը ապահովագիր տայ Սինոդին, թէ ժամանակին յիշեալ հողի համար պարտաւոր է վճարել գնահատող յանձնաժողովի որոշած արժէքը:

Նոյեմբ. 4-ին, թ. 675. Սինոդը լսելով Հին-Նախիջևանի Հայոց Հոգեւոր կառավարութեան անցեալ սեպտեմբերի 10-ի, թ 1364 յայտարարութիւնը, որոշեց. թոյլ տալ Հին Նախիջևանի Հոգեւոր կառավարութեանը ծախսել վիճակային արդիւնքից 150 ռուբլի կառավարութեան Գիււանը կարգի բերելու համար. պատուիրելով կարգաւորութեան գործն աւարտելուց յետոյ նոր միջնորդութիւն յարուցանել անպէտք գործերը ոչնչացնելու համար:

Նոյեմբ. 5-ին, թ. 678. Սինոդը լսելով Կուբանի նահանգի Եյսկ քաղաքի ս. Աստուածածին եկեղեցու ծխատէր Մարգարէ աւագ քահ. Սուքիասեանի տարւոյս յուլիսի 4-ի թ. 63 յայտարարութիւնը, որով ներկայացնում է Սինոդին 28 ռուբլի յօգուտ Ագանայի հայ տառապեալների, հանգերձ նուիրատուների ցուցակով, որոշեց. 28 ռուբլին

ուղարկել Կ. Պօլսի պատրիարքին, յանձնարարելով վերջինիս հասցնելու ըստ պատկանելոյն, իսկ նուիրատուների ցուցակն ուղարկել «Արարատի» խմբագրութեանը, պատուիրելով տպագրել այն «Արարատի» մէջ և գոհունակութիւն յայտնել նուիրատուներին: (Ծանօթ. նուիրատուներէ ցուցակը տպուած է Արարատի նոյեմբ. համարում, եր. 1112—1113-ում):

Նոյեմբ. 11-ին, թ. 687. Սինօդը որոշեց. պատուիրել Մ. Աթոռի գանձապահին ուղարկել Երեւանի արքունի գանձարանը 69 ռուբլի 43 կօպ. ջրային հարկ, Աթոռապատկան «Գետարգել» կալուածի համար:

Նոյեմբ. 11-ին, թ. 693. Սինօդը որոշեց. տալ երկրաչափ Ի. Մարուաշուիլուն երեք հարիւր ռուբլի Եղուարդ գիւղի հողաբաժանութիւնը կատարելու համար իբրեւ վարձատրութիւն:

Նոյեմբ. 11-ին, թ. 694. Սինօդը լսելով վանական կառավարութեան ամսոյս 5-ի, թ. 467 յայտարարութիւնը, որոշեց. թոյլ տալ նոյն կառավարութեան վաճառել Մայր Աթոռի շտեմարանից 100 խալ. ցորեն Վաղարշապատ գիւղի բահրայից ընթացիկ գնով և գոյացած դրամը մատուցանել Սինօդիս:

Նոյեմբ. 11-ին, թ. 695. Սինօդը լսելով Երեւանի կոնսիստորիայի անցեալ հոկտեմբերի 30-ի, թ. 7557, որոշեց. պատուիրել նոյն կոնսիստորիային նոր աճուրդ նշանակել «Զօրավարի» այգին վարձու տալու համար, և աճրդախօսութեան արդիւնքը ներկայացնել Սինօդիս ի հաստատութիւն:

Նոյեմբ. 11-ին, թ. 696. Սինօդը լսելով Երեւանի կոնսիստորիայի անցեալ հոկտեմբերի 30-ի թ. 7551 յայտարարութիւնը, որոշեց. պատուիրել նոյն կոնսիստորիային Գետարգելի հողերը վարձու տալու համար նշանակել նոր աճուրդ նախկին պայմաններով, սկսելով աճրդախօսութիւնը այժմեան վարձագնից և աճրդախօսութեան արդիւնքը մատուցանել Սինօդիս ի հաստատութիւն:

Նոյեմբ. 12-ին, թ. 707. Սինոդը լսելով Նորին Սրբութեան նոյն ամսի 4-ի, թ. 2403 կոնդակը, ի Տէր հանգուցեալ Գրիգոր արքեպիսկոպոս Գառնակերեանի մահից յետոյ մնացած գրամի և գոյքի մասին, որոշեց. նախ՝ պատուիրել Մ. Աթոռի գանձատպահին մուտք գրել Մ. Աթոռի տուժարում 1003 ռուբլի կանխիկ դրամը և չորս հազար ռուբլու թ. 54353—1363 տոմար, երկրորդ՝ հանգուցեալի գոյքը տեղաւորել գանձարանին կից սենեակում:

Նոյեմբ. 18-ին, թ. 716. Սինոդը որոշեց. պատուիրել Վանական կառավարութեան աճուրդ նշանակել Փարաքուրի Աթոռապատկան այգին վարձու տալու համար, վեց տարի ժամանակով, սկսելով աճրդախօսութիւնը 350 ռուբլուց:

Նոյեմբ. 19-ին, թ. 731. Սինոդը լսեց Վանական կառավարութեան նախագահ Ներսէս վարդապետ Մելիքթանգեանի նոյն ամսի 12-ի յայտարարութիւնը և որոշեց. պատուիրել Վանական կառավարութեանը չափել տալ երկրաչափ Մարուաշուիլու ձեռքով Մ. Աթոռի սեփական հողերը Վաղարշապատում: Այդ աշխատութեան համար հատուցանել երկրաչափին դեսեստինին 30 կոպէկ:

Նոյեմբ. 19-ին, թ. 732. Սինոդը լսեց Երևանի Կոնսիստորիայի նոյն ամսի 6-ի թ. 7702 յայտարարութիւնը Դուին գիւղի եկեղեցու նորոգութեան մասին, որոշեց. թոյլ տալ Դուին գիւղի ծխականներին ծախսել եկեղեցու նորոգութեան վրայ 445 ռուբլի եկեղեցու գրամագլխից, ծխական ժողովի որոշման համաձայն:

Նոյեմբ. 19-ին, թ. 733. Սինոդը լսելով Նորին Սրբութեան նոյն ամսի 6-ի, թ. 2329 կոնդակը, որոշեց. Արդահանի Էմմանուէլ քահանայ Դեմիրջօղլեանին ազատ համարել քահանայութեան կարգից և իսպառ արձակուած հոգևոր կոչումից: Վճռիս կատարման համար հրաման տալ Երևանի Կոնսիստորիային և տեղեկացնել Կարսի և Տփլիսի նահանգապետներին:

Նոյեմբ. 19-ին, թ. 735. Սինոդը լսելով Աստրախանի

Կոնսիստորիայի տարւոյս օգոստոսի 27-ի, թ. 3210 յայտարարութիւնը, որոշեց. թոյլ տալ Արմաւիրի եկեղեցու երեսփոխանին ծախսել եկեղեցու դրամազլխից 5000 ռուբ. ծխական ժողովի որոշման համաձայն՝ նորակառոյց եկեղեցու շինութեան վերայ՝ շինութեան հողաբարձութեան ձեռքով: Վճռիս կատարման համար հրաման տալ Աստրախանի Կոնսիստորիային:

Նոյեմբ. 19-ին, թ. 736. Սինօդը լսելով Վանի Հայկաղեան Կենդրոնական և Սանդխտեան վարժարանների նախագահի հոկտեմբեր 13-ի խնդիրը Գ. Սերերբեկեանի կտակած գումարի տոկոսների մասին, որոշեց. այդ կտակագումարի սոյն տարուայ տոկոսները 456 ռուբլին փոխադրել Վանայ Առաջնորդարանի անունով, Տփլիսի առևտրական բանկի միջոցով և փոխադրութեան տոմսը ուղարկել Վանայ առաջնորդարանին:

